



冬至燉補

冬至該日，阿梅就會燉補，分一屋下人食，這條阿明從細到大，印象當深个一件事。記得阿明還細，阿梅一屋家人就戴在柑仔寮——一個原旦放柑仔，續後簡單整理出來个屋。一間陋陋尚尚个屋，寒天一到，仰般遮、仰般塞就無法度阻擋，冷咻咻仔个寒風尋著縫鑽入屋肚、間項來。暗晡頭睡目，阿梅一屋下人輒常擠擠擎一頂眠床，睡到共下，一領被骨拉上拉下，拉到大家入覺為止。

寒天到來愛燉補，阿梅一直記在心肝肚，乜一直有做著。在柑仔寮，阿梅自家一儕人，愛渡四個子女，生活上重重个擔頭，佢一肩揸起。出外同人做小工、摘茶，在田項種菜、屋下綦珠仔、剪線結或者割兜仔机仔、弓蕉來賣，所有莊下做得賺錢个頭路，佢拚命去尋、煞猛去做，較苦苦自家，一心就想愛分子女過好个生活。像阿明出著世來，就黃皮瘦弱，手腳生到像鉛線仔樣，係平常無分佢食較好兜仔，冬至無燉補分佢食，驚怕會畜毋生喔！

「阿姆，您鑊仔裡肚燉个係麼个，還香喔！」阿明在灶下鼻著，自從毋識鼻著个味緒，自鼻公鑽入，引出嘴空肚个口涎水，順等喉嚨頭流入胃腸肚。胃腸產生一種嘅哩咕嚕、嘅哩咕嚕个聲響，這聲響停動著敏感个神經，黏邊傳到大腦，連著另外一條神經。無兩下半，阿明忍毋核開嘴就講：「阿姆，佢想愛食燉補。」「好喔！這就係愛燉分你恁多姊妹食个啊！等若姊放學轉來共下食。」阿明个嘴像屎缸蟲樣蠕蠕動，口涎水緊流。

冬至這日暗晡，外背冷風雪雨，阿梅一屋下人在柑仔寮共下食燉補。阿梅夾一隻燉到酪酪个雞脾分阿明，阿明同雞脾擎到一絲一絲仔，一絲一絲嚼，傍一口一口个燒湯。黏時，該講毋出个燒暖，流入嘴空，流入喉嚨、胃腸裡肚，再跔等血液流到膚身通體，歸屋間，就恁樣燒暖起來。外背入肉刺骨个寒風，溼毋著阿明，乜溼毋著阿明个屋下人。

「阿明，天光日冬至，阿姆無閒，記得愛燉補，阿姆正去分你請喔！」「好喔！佢定著會燉，你也愛記得過來食喔！」三十零年後，阿梅同阿明提醒講，冬至愛燉補。

作者：邱一帆

☆詞彙學習☆

【燉補】dun' bu'：以慢火將補身的藥物、食物熬煮。

【綦珠仔】kien zu' e'：串聖誕燈泡。

【陋陋尚尚】leu leu seu seu：簡陋不堪。

【黃皮瘦弱】vong' pi' ceu ngiog：形容人面黃飢瘦、營養不良的樣子。

【擠擠擎】ji' ji' qiu'：擠滿。

【酪酪】log' log'：熟爛。

【做小工】zo seu' gung'：打零工。

【溼】gien：以冷物碰觸。

☆文法學習☆

【原旦……續後……】原先……後來……。表示時間先後，情況、條件的改變。

例1：佢原旦同人食頭路，續後自家做頭家。（他原先跟人家工作，後來自己當老闆。）

例2：這位原旦安到山豬湖，續後改做珊瑚湖。（這裡原先叫做山豬湖，後來改成珊瑚湖。）